

卷頭言

黃純青

有明延平王招討大將軍賜姓成功生於天啓四年（公元一六二四）七月十四日，實爲是年陽曆八月二十七日。歷三百二十有六年，而今年陰陽二曆復於是日合其軌。臺灣省文獻委員會因建議省政府，今後，定每年國曆八月二十七日爲鄭延平誕辰紀念日。經核准公布。卽於是日開其遺物，遺蹟展覽會并編輯文獻專刊專號以紀念之。夫延平之大節彪炳，雖其敵滿人猶知褒揚，欽仰。逐荷蘭，拓蕃壘，吾臺賴之變草萊爲沃壤，進蠻夷爲華夏。其功業豈啻太伯之於吳，箕子之於朝鮮而已哉。自乙未淪陷五十年中，日人亦復推崇備至。爲特置祠廟，四時伏臘，禱祭不絕。乙酉光復，臺胞如夜啓旦，如慶更生，日本經營之物質文明，毫不足有以移其中，保我民族正氣吐光芒於萬丈，咸應歸之「延平精神不死」。夫英雄之受崇拜，忠烈之蒙景懷，代有人焉。若延平自開臺以來，幾經易代而褒於清，尊於日，鼎鼎二百餘年間，長受崇敬，不稍間輟，而其精神至今日猶溶鑄臺人，則有史以來，未嘗有也。臺灣省通志人物自以延平爲權輿。本會自通志館時卽考究不遺餘力。今茲所輯，雖未敢自謂允臻完善，而極搜采之勤，窮考證之方，則同人輩庶幾盡其力之所及。而遺略，錯謬終恐不能或免，斯端賴各界多與指正。斯輯之成，今省政府主席吳公國楨尤加獎贊，若得因之更發揚民族正氣，同舒國難，則文獻報國之實於焉斯舉，而奉慰延平英靈於地下爲何如也。